

CBETA電子佛典集成

CBETA Chinese Electronic Tripitaka Collection
ebook

X35n0648

高王觀音經註釋

清 周上智錄出

中華電子佛典協會



目次

- [編輯說明](#)
- [章節目次](#)
 - [No. _648-A 西來妙諦序](#)
 - [No. _648-B 後跋](#)
 - [淨口業直言](#)
 - [淨身直言](#)
 - [安十地直言](#)
 - [佛說高王觀世音經](#)
 - [No. _648-C 高王經原起](#)
- [卷目次](#)
 - 1
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 648-A 西來妙諦序

盖聞。虞廷十六字。衍心法治統之傳。太上五千言。闡道德神仙之旨。粵稽內典。悉寓真詮。溯三教之同源。惟經不易登羣生於覺岸。在佛言慈。是以淨域靈根。辯才無礙。梵宮秘笈。慧業微聞。用能廣濟度之梯階。豈第結因緣於香火哉。今涵虛子。固玄下弟子也。兼修戒定之力。發生刊布之心。冀警勸乎同門。藉宣揚為程課。遂取貝葉心傳之所秘藏。優婆夷塞之所受持。集以成書。壽諸世域。引枝尋源。資其發軔。如高王觀世音經般若波羅蜜多心經等品經呪綜卷。錄呈呂帝師牟尼文佛。閱定嘉之。命以西來妙諦。顏其帙。嗟乎釋氏之教。已久晦矣。彼其七心多妄。四縛易嬰。徒嫌鑿柄之機鋒。誰作當頭之棒喝。而君獨吹光藜火。披礫恒沙。思開清淨之門。俾入毗盧之界。願可云宏矣。顧說者謂。大藏琅函。遺編充棟。法門玉律。妙旨傳燈。悟入無言。證成因果。菩提明鏡。無相胥歸。何必晨鐘暮鼓。始勗虔修乎。抑知文字之益。所以闢真緘諷習之勤。所以祛慾障。茲雖倉分稊米。寔足囊括三乘。誠解研鑽。何殊薪傳衣鉢。將使情田自穫。性海無塵。胸羅卍字。皈命金天。三年面壁。大眾到梅子熟時。一笑拈花。居士聞木樨香否。果識即心是佛。奚論無色非空。則不徒提暢宗風。而信已門開甘露。不有大覺入寶山。而手仍空。如是我聞。使頑石之頭能點。

光緒戊寅歲夏同玄求是子謹序於武林蓼花仙館退省室

No. 648-B 後跋

夫高王觀世音經。般若多心經。大悲陀羅尼神呪。準提呪。傳世最久。信奉持誦者廣。而消愆獲福者無窮。故靈驗寔跡。載諸各經呪本者。不知凡幾也。然雖有刊布或經本或呪圖。未能彙輯。固屬易於印送。究未成集闕然也。(予)素崇玄學。未諳禪修。先荷大士甄

錄。上智傳派。復蒙佛恩授記。悟靜頌名。沐聖德之栽培。[(厂
@((既-无)-日+口))*頁]涓涓之罔報。就於同善錄中所輯禪宗經呪
齋期。錄出壽世。以便崇奉者朝夕捧持。不致卷軸紛紜。其靈驗事
實。同善錄中。按篇俱在。茲不刊列。庶昭簡捷。並倩同玄樂君石
友。恭楷付梓。板儲西湖昭慶慧空經房。印造流通。以廣其傳。

時光緒戊寅歲 悟靜周上智敬跋

No. 648

佛說高王觀世音經註釋

○淨口業真言

淨者。洗滌而蕩盡之。凡人造業。不外言行兩端。口過尤為易
犯。必淨滌之。方可修真養性也。

修利修利

修者。修持之謂。利者利己而兼利人也。兩句複之重言。以申明
之也。

摩訶修利

摩訶。大也。大有所修持。而後能利也。

修修利

愈修愈利也。

薩婆訶

薩者。見也。婆者。一切平等也。訶者。一切法無因寂靜。無住
清淨。不生不滅之義。言佛力普照。無分貴賤智愚。盡致之清淨
不生不滅也。

○淨身真言

身兼視聽行動。言淨身者。即非禮勿視。非禮勿聽。非禮勿動之謂。獨舉言行兩端。即謹言慎行也。

修多利修多利

修身之道多端。必多方修之。方能有益也。

修摩利

摩即摩訶也。言能修者。其利必大。與摩訶修利。句淺深有別。

娑婆訶

娑者。一切法平等。婆者。無言說義。訶者。一切法無因。寂靜無住。清淨不生不滅之義。言佛無言說。無分貴賤智愚。盡致之清淨不生不滅也。

○安土地真言

人生履后土。而戴皇天。后土安。皇天亦安矣。人當謹言慎行。後必求可對天地而無愧。故淨身後。必安土地。

南無三滿多沒馱喃

天地以一萬二千年。為一劫。自混沌後。空無所有。天開於子。地闢於丑。人生於寅。人物漸生而漸滿。故云三滿劫。交至酉戌亥。人物漸稀而漸少。故云三減劫。是謂沒馱喃。沒無也。馱載也。沒馱喃者。言地無所載也。佛之修行。從三滿劫。修至沒馱喃。三減劫。方成大道。

○石亭和尚云。釋迦修行。經三滿劫。第一阿僧祇滿劫。奉事寶相佛。至千佛等。第二滿劫。承事燃燈佛。至千佛等。第三滿劫。供養勝觀佛及千佛等。一一無空過者。交至莊嚴減劫。初閻浮人壽八萬四千歲。身長八丈。凡過百年。命減一歲。身減一寸。過千年。命減十歲。身減一尺。如是減至十歲。身存一尺。盡矣。於減劫中。度生無量。前三滿劫。即是三增劫。凡過百年。身增一寸。命增一。歲至千年。身增一尺。命增十歲。如是增至八萬四千歲。身增八丈。如是三滿三減。為三大阿僧祇劫。釋迦方稱萬德圓滿。

唵

唵有二說。一指諸鬼神聽。一指流注不生滅義。此應指不生滅義而言。

度嚕度嚕

嚕者。合胎生卵生濕生化生而言。言佛之普度一切也。

地尾薩婆訶

尾者。地之極邊也。自中國蠻貊。至日月所照霜露所墜之地。皆是也。薩婆訶。已註上文。言佛法普照。無分東西南北。中夏夷狄。盡度之而致清淨不生不滅也。

○上二句。合千古言。此句指天下言。通節總言遍古今。合天下。佛於其中。普度一切也。

佛說高王觀世音經

觀世音經眾矣。而言高王觀世音經者。以是經為高王國所傳出。較西藏諸經。尤為可信。曰佛說者。以是經為觀世音之所親授。

較他經為倍可珍也。

觀世音菩薩。

觀世音者。觀世間善惡因由也。菩之為言照。薩之為言見。觀世間善惡因由。而照見之也。

南無佛。南無法。南無僧。

南無者。歸依也。佛家以佛法僧為三寶。佛即性之體。即儒家天命之謂性。南無佛者。明心見性。法即修行之道。即儒家率性之謂道。南無法者。修持而至於明心見性也。僧大眾之謂。南無僧者。教大眾修持。而歸於心見性。即儒家修道之謂教也。

佛國有緣。佛法相因。

相因即歸依也。言與佛國有緣者。方能歸依佛法。

常樂我靜。有緣佛法。

常者。終身如一日。靜常作淨觀。下淨光兩字可見。所謂主靜立人極也。不必專指清淨寂滅說。終身能以主靜為樂者。方謂有緣佛法。

南無摩訶般若波羅蜜。是大神呪。南無摩訶般若波羅蜜。是無上呪。南無摩訶般若波羅蜜。是無等等呪。

波羅蜜者。彼岸也。彼岸即佛之明心見性地位。般若者。言有智慧。善破一切煩惱。轉為妙用也。摩訶者。大也。波羅蜜者。有六。或布施。或持戒。或忍辱。或精進。或禪定。或智慧。各占六度之一。惟般若。能破一切煩惱。則六度兼該。萬行俱備。當下即具佛體。即儒家所云。我欲仁斯仁至矣之謂。俚語所云。

放下屠刀。立地成佛。是也。大神者。言其至神速也。大明者。言其至明亮也。無上者。言其無可加也。無等等者。言其莫與匹也。

○自始至此為一段。

○石亭和尚云。是大神呪者。能驅生死之魔。是大明呪者。能破長夜痴暗。是無上呪者。般若是最上發心。是法中王。所以無上也。是無等等呪者。般若是六度之第一義。無佛與之等齊也。

南無淨光秘密佛。法藏佛。

淨光者。頂上淨字說下。即波羅蜜也。淨而日光。則知當作靜字解。秘密對語言解說。言歸依佛法者。不用語言解說。而使性光常靜。方是佛藏正法。

師子吼神足幽王佛。

師與獅通。釋迦初生。自行七步。一手擎天。一手指地。張目四顧。如師子吼。以示上天下地。惟我獨尊。而神足徧照幽冥也。

○石亭和尚云。神足通佛。得六通而成道。六通者。天眼通。天耳通。他心通。宿命通。漏盡通。神足通。即如意通。神足通者。於一剎那。而到四天下也。幽王者。所處靜寂而不動也。

佛告須彌燈王佛。法護佛。

金剛經所載。如來告須菩提云。我於燃燈佛。師法無所得。蓋佛法必心無所住。故告須菩提。法無所得。正所以護持佛法也。

金剛藏師子遊戲佛寶勝佛神通佛。

金剛藏所載。有色相有空相。所載莊嚴法像。變化神妙。皆如師子遊戲於世也。世人以此謂佛之勝境。而寶貴之。其實不過佛之神通耳。

藥師瑠璃光佛。

藥以療病為功。師以訓導為能。琉璃者。借佛國帝青寶石。極其明淨者。以喻佛身。言醫治眾生。必先性體。極其光明也。

普光功德山王佛。

佛居山中。而功德普徧十方。即儒家光被四表。格於上下也。

善住功德寶王佛。

作善功德。住於一方也。

過去七佛。

石亭和尚云。一梵語毗婆尸佛。華云智光圓滿。二梵語尸棄佛。華云大智光也。即根本智。三梵語毗舍浮佛。華云徧一切自在。四梵語拘留孫佛。華云永斷煩惱。五梵語拘那含牟尼佛。華云能仁寂默。以寂默故。不住生死。以能仁故。不住涅槃。悲智雙運。利物無窮也。

○以上皆指修持已成者焉。

未來賢劫千佛。

按三十佛國記所載。賢劫千佛名。千小兒生於恒水上流國。其母生一肉胎。擲之恒水。為他國王收養。後長大。甚勇健。所往征伐。無不摧服。次伐其所生本國。國王大憂。其母夫人。登城東高樓。語云。汝是我子。何故作逆倫事。始不信。後詳言之。則

放弓。伏拜其母。而拜其父。世儒以佛為無父無君。故他佛出處皆不載。此獨舉之。

千五百佛。萬五千佛。五百化身佛。百億金剛藏佛。

賢劫千佛佛名也。而以未來貫下者。皆以借喻未來修持者而言。

定光佛。

即普光王如來也。此獨舉定光者。蓋言定而後能靜。無論過去未來。欲求靜者。必先求定耳。通卷所稱佛名。皆有至理。豈泛然雜舉。

○淨光秘密佛至此為一段。

六方六佛名號。

此句即下文東南西北上下六句。總冒人生於東。長於南。成於西。歸於北。魂昇於天。魄降於地。故云六方。

東方寶光月殿月妙尊音王佛。

寶光言性體之可寶也。月殿月之芽也。音影也。言人之始生性體之光。如月中之影。其體甚微。而實至尊至妙也。

南方樹根花王佛。

言有根者。自能發花也。

西方皂王神通燄花王佛。

世間如一大染場。必神通廣大。方能世燄不染也。

北方月殿清淨佛。

人之身後。歸至清淨。如月之晦也。

上方無數精進寶首佛。

首元始也。清明之氣上昇。自能精進不已。而保其元善之初也。

下方善寂月音王佛。

昏濁之氣下降。如月中之影。盡歸寂滅也。

無量諸佛。

諸佛皆從無量劫修行而成。

多寶佛。

言性體之可寶也。

釋迦牟尼佛。

釋迦之義。云能仁。牟尼之義。云寂默。能仁者。即心性無邊。含容一切。寂默者。即性體本寂。動靜不干也。

彌勒佛。

彌無不也。言性體上達無不。勒住之。而不使下達也。

阿閼佛。

閼初也。阿合乎人之始初也。

○石亭和尚云。阿閼不動常住法性。故亦此意。

彌陀佛。

無量壽佛也。

○東南西北上下六句。言人人皆具佛性。下言有修持之功。所以成無量壽佛也。

○六方六合名號至此。又為一段。

中央一切眾生。在佛世界中者。

眾生兼人物而言。自開闢至今。皆有佛持世。故云在佛世界中。

行住於地上。及在虛空中。慈憂於一切眾生。各令安穩休息。

言由定而靜。方能安人安物也。

晝夜修持。心常求誦此經。能滅生死苦。消伏於毒害。

伏即金剛經降伏其心之謂。毒害即雜妄惡諸念。是也。佛與言求功名得功名。求富貴得富貴。求子息得子息。而此毒言生死毒害者。蓋恐人之入子貪嗔痴耳。

那摩(那摩與南無通)大明觀世音。觀明觀世音。高明觀世音。開明觀世音。藥王菩薩。

向稱星宿光長者。持藥普施眾生。四百四病。無不除愈。即能滅生死苦也。

藥上菩薩。

藥王菩薩之弟。即電光長者曰。我兄但治身病。不醫心病。即將兩手擎藥。施於眾生。貪瞋痴病悉滅。菩提智慧即生。十惡化為十善。六塵化為六度。有著化為無住。即所謂消伏於毒害也。

文殊師利菩薩。

文殊與世文迥異。道德足為人師。而有利濟者也。

普賢菩薩。

德無不徧曰普。佑上利下曰賢。

虛空藏菩薩。地藏菩薩。

指上天下地而言也。

清涼寶山一萬菩薩。

寶山。即方寸之謂。言此心清涼。則萬事萬念。皆能照見。或云清涼寶山地藏王處。現在金陵。今指心言。恐未是。不知向稱靈臺。方寸靈臺。即佛之靈臺也。借以喻心清涼。寶山何必擬實看。

普光王如來。化勝菩薩。

如來者。如人之本來。即儒家復初之謂。言不失其初心者。其光普照一切。雖外緣千變萬化。而自能勝之也。

○石亭和尚云。如來者。無所從來。亦無所去。故名如來。普光者。其光普照。而無些微逃遁也。

念念誦此經。

念念者。言無一念夾雜之謂。

七佛世尊即說呪曰。

七佛即過去七佛也。呪祝也。以是法而祝之。使從所祈也。呪或諸佛密語。出於心術妙用。冥加之功。不可得而思議。或鬼神主名。呼其主則妖魅竄伏。

離波離波帝

離去世上一切風波也。

求訶求訶帝

訶者。一切法無因。寂靜無住。乃清淨不生不滅之義也。

陀羅尼帝

華云總持。摧邪立正。殄惡生善。皆總而持之。

尼訶囉帝

將邪正善惡一切掃除也。

毗離尼帝

毗尼。即六度中之精進不_已也。

摩訶迦帝

迦者。仁之體。摩訶迦帝。言仁體之廣大也。

真靈乾帝

真性之靈。與天合德。即上天之載。無聲無臭也。

娑婆訶

娑者。無言說義。婆者。一切法平等。訶者。一切法無因。寂靜無住。清淨不生不滅之義。言佛無言說致萬古一切悉致清淨不生不滅也。

佛說高王觀世音經註解(終)

No. 648-C 高王經原起

昔五代時。有高歡國王。為相州郡主。好殺。適寶藏官孫敬德。誤犯重法。囚禁就死。忽夢見一僧曰。汝持誦觀世音經一千遍。當脫刑名。敬德曰。今在禁中。安得經典。僧曰。吾口授汝。睡覺。敬書便無忘失。虔心誦念。得九百遍。文案已成。王遂令赴市斬之。敬德問監使。市之遠近。監使者曰。問之何故。敬德曰。時夜夢。一僧令持觀世音經千遍。當得免死。今尚欠一百。請求緩行隨路。急念滿數。至市。監使宣勅斬之。身首不損。刀折三段。呈王。王駭提問。汝何幻術。令得如此。敬德曰。實無幻術。因在獄中畏死。祈禱觀音。忽夢。一僧教誦觀世音經一千遍。獲福如是。王謂敬德曰。汝勝於我。與佛何異。王喚典獄者。書是經。令諸罪人合死者。各持誦千遍。斬之。取驗悉應。王乃勅下。令民普誦。用證福果。世遂傳稱高王觀世音經云。

[CBETA 贊助資訊](#)

[.https://www.cbeta.org/donation/index.php](https://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
